

14.08.2025

UKA2025/169

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naartunermi, erninermi meeravissiarternermilu sulinngiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-ini, siornatigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Jens NapãtôK', Naleraq)

Tunngavilersuut:

Erninermi ullormusiaqarnerup siunertarivaa isumannaarnissaa angajoqqaat aningaasatigut tapersernissaat ernereernerminni sulinngiffeqarneranni, tamannalu periarfissiivoq inoorlaap ilaginissaanut ilaqutariinnerullu peqqinnartumik aallartinnissaanut meeqqamut iluaqutaasussaq.

Ajoraluartumik qinikkatut pisariaqanngitsumik naligiinnginnerujussuarmik pilersitsisimavugut atugarissaarnerusut salliunneranni, inuiaqatigiinni meeqqap iluaqutissaa salliunneqarani, kisianni angajoqqaajusut isertitaat. Killormulli aningaasanik agguataarinikkut.

Isertitaqarnerugaanni, inuiaqatigiit meeqqamut angajoqqaanullu akiliinerusarput. "Robin Hood"-i killormoortoq pisariaqanngitsumik pissakinnerit meeraallu annikinnermik ernereernerminni aningaasarsitillugit. Tamanna nalunnginneqaatigissanngilarput. Meeqqamut iluaqutaasoq angajoqqaallu periarfissaat meeqqamut pitsaasoq aallartinnerlu peqqinnarnerusooq salliuttariaqarparput.

Inuiaqatigiinni eqimattakkaarpasut eqqugaapput pisariaqanngitsumik naligiinnginnerup pilersinneqarnerani. Aalisartukkormiut, piniartukkormiut, savaatillit, anaanat kisimiittut allallu nalunnginneqaatigissanngilarput salliunneqannginneri atorfillit meeraannut sanilliutissagaanni.

Meeqqat tamarmik inuunermi pitsaanerpaamik aallartiffeqassapput.

Taamaattumik meeqqamut pitsaanerusoq salliunneqassappat, inuiaqatigiinnilu naligiinnerusoqassappat, siunnersuut tamanna pingaaruteqarpoq meeqqamut

toqqissisimanermik pilersitsissammat, angajoqqaanut, ilaqutaasunut, siunissamilu meeqqap peroriartorfigisassaani.

Pisortanut aningaasatigut allaffissornikkullu kingunerisassat

Anaanat angerlarsimaannartut erninermusiaat tulluarsarsinnaasuuppata atorfilittut, qaffassinnaagualarpoq sapaatip akunneranut akunnernik 14-iniit erninermusiaqarnermiit sapaatip akunneranut akunnernut 40-t tikillugit.

Sapaatip akunneranut 1.490,58 kr-miit (106,47 kr. x akunnerit 14-it) sapaatip akunneranut 4.258,80 kr.-mut (106,47 kr. x akunnerit 40-t). Tamanna isumaqassaaq anaanaq sapaatip akunneranut 2.768,22 kr.-mik isertitaqarnerulissammat.

Erninermusiat sapaatip akunnerni 19-ini 28.321,02 kr.-miit (1.490,58 kr x sapaatit akunneri 19-it) 80.917,20 kr.-nut (4.258,80 x sapaatit akunneri 19-it), malitsigissavaa aningaasartuutaasut 52.596,18 kr-it qaffanneri anaanamut ataatsimut.

2024-mut aningaasanut inatsimmi 26 mio. kr.-t immikkoortinneqarsimapput tassungaartut. Ernereermermi ullormusiat anaananut angerlarsimaannartunut annertusipput annertussusiliussaq qaffasinnerpaap ataatsimut aningaasartuutigissavaa qaavatigut ukiumut 30-35 mio. kr.-t ernereermermi ullormusianut. Naalakkersuisut akissutiminni ukiumut annertunerpaamik 9 mio. kr.-nik qaffassasoq nalilersimavaat.

Namminersorluni inuussutissarsiuteqarnermut aningaasatigut allaffissornikkullu kingunerisassat

Soqanngilaq.

Innuttaasunut aningaasatigut allaffissornikkullu kingunerisassat

Katimasut angerlarsimaannartut, inooqatillit, aalisartut, piniartut savaatillillu, anaanat kisimiittut angerlarsimaannartut, allallu, ilaqutariit angajoqqaanngorlaat aningaasatigut oqilisaavigineqarujussuassapput isumannaarneqassallunilu naligiinnerusoq meeqqaamut iluaqutaasusaaq.